

## VIE DV PAPE

IVLES SECOND

GRAND ENNEMY

DV BON ROY LOVYS

DOVZIESME ROY DE FRANCE,

&amp; des François gens de

bien tant Ecclesiasti-

ques qu'autres.

M. DC. XV.

**A** My lecteur, Plusieurs cy deuant & encor à present, se sont meslez, de descrire la vie de quelques Papes, qui ont mal fait leur deuoir en l'administration de leur charge. Mais s'ils eussent veu ce present dialogue, dès long temps escrit en latin par vn homme docte, de la vie & meurs de Iules second, il n'eust fallu prendre tant de peine. Car ce petit traicté eust esté suffisant pour auoir vne Idee de la vie d'une grande partie des Papes. C'est pourquoy ayant trouué ce Dialogue Latin, il m'a semblé bon pour releuer de peine ceux qui voudroient encor escrire de mesme argument, de le traduire en françois: affin que nos françois qui ont la pieté, & religion Chrestienne vrayement en Recommendation, apprennent à vser de discretion lors qu'il sera question de receuoir les Commandemens de la Cour de Rome, Adieu lecteur, lis, & en lisant garde toy de rire.

A ij

## DIALOGVE V R A Y E M E N T

plaisant & elegant, d'un personnage tres-  
docte, par lequel il est monstre que l'en-  
tree de Paradis a esté refusee par le Por-  
tier S. Pierre à Iules second Pape de Ro-  
me, qui apres sa mort heurtoit à la porte,  
combien que de son viuant il fust non  
seulement appellé tressainct, mais aussi  
l'on luy attribuaist le nom de Saincteté  
mesme, & d'auantage qu'il eust esperé  
d'estre Seigneur du Ciel, à cause de la re-  
nommée par luy acquise, pour estre si  
heureusement venu a bout de si grands  
exploits de guerre.

*Les entreparleurs, Iules second, son Ge-  
nie & saint Pierre.*

Iu. **Q**u'est-cecy? ceste porte ne se peut  
ouurer, i'estime ou bien que l'on a  
changé ou bien meslé la serrure.

Ge. Mais plustost pren garde que tu n'ayes  
apporté la clef qu'il falloit: Car ceste porte  
ne souure pas de mesme clef que le coffre  
aux escuz: Et pour ceste occasion que n'as  
tu apporté & l'une & l'autre? Car ceste clef  
cy est la clef de puissance & autorité, & nō  
pas de science.

I. Mais ie nay iamais eu aucune autre clef

que celle cy, & ne voy point qu'il soit besoin de l'autre ayant ceste cy.

G. Ne moy aussi. Mais si nous ne trouuons quelque eschappatoire, nous auôs le dehors pour le dedans.

I. La colere me surmonte. Je heurteray à la porte, hola, hola, que quelqu'un vienne incontinent ouurir la porte, qu'est-cecy personne ne s'auâce de venir, que tarde si long temps ce Portier? ie croy qu'il dort apres auoir bien beu.

G. Comme il mesure vn chacun à son aulne.

S.P. Il va bien de ce que nous auons vne porte aussi forte que le diamant, autrement quiconque il soit il l'eust brisée, il faut que ce soit quelque geant, ou lieutenant de grâd Seigneur, Destrueteur de villes, Dieu immortel quelle puante Cloaque est-ce que ie sens: ie n'ouuriray pas si tost, mais regardant d'icy par ceste petite fenestre treillissée, iecognoistray quelle mauuaise encontre c'est. Qui es tu, ou que demande tu?

I. Mais que ne m'ouures tu la porte le plus tost que tu pourras: Car si tu eusses faict ton deuoir, tu deuois venir au deuant de moy, voire avec toute la compagnie des habitans de Paradis.

P. C'est parlé par commandement: mais toy



racomptes nous premierement qui tu es?

I. Comme si tu ne le voyois pas bien.

P. Que ie le vois, à la verité ie voy vn spectacle affin que ie ne die vn monstre nouveau & que ie n'ay point iusques a present veu.

I. Mais si tu n'es du tout aveugle tu recognois ceste clef d'argent, si tu veux faire semblant de ne cognoistre ce chesne d'or. Tu vois aussi ma triple couronne, & ma chappe de tous costez reluisante d'or, & pierres pretieuses.

P. Certainement ie recognois aucunement ceste clef d'argent, encor qu'elle soit seule & de beaucoup dissemblable a celle qu'autrefois le Christ vray pasteur de l'Eglise a mise entre mes mains. Quant a ceste couronne si superbe & arrogante, comment la pourroi-je recognoistre, veu que iamais il ne s'est trouué aucun tyran Barbare qui en ait osé porter vne semblable, tant s'en faut que celuy qui demande a entrer en ce lieu le deult faire? Quant a ceste chappe c'est chose qui ne m'esmeut aucunement, & dont ie n'ay cure, comme celuy qui ay tousiours mesprisé & foulé aux pieds l'or, & les pierres pretieuses, tout ainsi que ce qui prouient de la ruine des murailles. Mais qu'est-ce que cecy ie voy par tout & en la clef en la couronne, & en la chappe, des marques & ensei-

gnes d'un tresmechant tauerrier & imposteur nommé Simon comme moy, mais qui estoit bien eslongné de là vie que ie menoïs, lequel j'ay autrefois dechassé par l'aide de Christ.

I. Laisse la ces fatras, si tu es sage, car si tu ne le sçais ie suis ce Iules de Genes & recognoïs comme ie croy, ces deux lettres P. M.

P. l'estime qu'elles signifient vne tresgrande peste.

G. Ha, ha, ha comme ce deuin a touché au point.

I. Mais plustost elles signifient tresgrand Pontife.

P. Quand ainsi seroit que tu serois trois fois tresgrand, & d'auarage mesme que ce Mercure surnommé Trismegiste, tu ne serois pas icy receu si tu n'es tresbon, c'est a dire Tres-sainct.

I. Mais si estre appellé sainct sert à la cause, tu es par trop eshonté en retardant de mouurer la porte, veu que par tant de siecles tu as esté seulement appellé sainct, mais quant a moy personne ne ma surnommé sinon tres-sainct, tesmoin cinq mille Bulles qui sont en lumiere.

G. Ce sont vrayement Bulles, & choses de neant qui s'esuanouissent tout soudain.

I. Esquelles Bulles ie suis nommé plusieurs

fois Seigneur tressainct, voire ne suis pas seulement surnommé du nom de saint mais de sainteté mesmes de telle façon qu'il disoit que la sainteté du tressainct Seigneur Iules, auoit fait tout ce qui me venoit a gré.

G. Voire mesmes lors que tu estois yure.

P. Que ne demandes tu donc Paradis a ces flatteurs qui t'ont fait tressainct, & que ceux la mesmes te donnent bon-heur & félicité, desquels tu as eu la sainteté. Mais outre cela estimes tu qu'il n'y a rien a dire entre estre appellé saint ou l'estre.

I. Je suis en cholere, mais s'il m'estoit permis de viure, ie ne t'eusse point enuié ceste sainteté & félicité.

P. O la voix qui demonstre vne tressainte sainteté d'esprit ! Combien que & autrement des long temps te regardant par tout de mes deux yeux ie voy en toy plusieurs marques d'impieté, mais nulle de sainteté car que veut dire ce train si peu seant a vn Pape, d'auantage tu amenes avec toy presques vint mil hommes, & n'en voy pas vn en si grande compagnie, qui ait la face d'un Chrestien. Tu me sembles amener avec toy vn amas de meschans hommes, qui ne sentent rien que les bordeaux, le vin, & pouldre a canon. Ils me semblent des larrons mercénaires, ou bié des masques infernaux.



qui sont enuoyez par deça pour faire guerre au Ciel, & tant plus que ie te regarde, moins i'apperceoy en toy aucune apparence d'un homme Apostolic. Premieremēt quel monstre est-ce la, Combien que par dessus tu portes l'ornement d'un prestre, cependant au dedans estant tout ensanglanté par les armes tu bruits & te herisses. Outre ce, quels yeux cruels as tu? qu'elle bouche hautaine, quel front menassant, quels sourcils arrogans? car i'ay honte de dire, & suis fasché de voir, qu'il n'y a nulle partie de ton corps qui ne soit souillée de marques de paillardise abominable & monstrueuse affin que ie ne die que mesme a present tu me semble ne faire que rōter, & sentir le vin, comme yurongne, voire mesmes auoir n'agueres vomī. Finallemēt la disposition de ton corps est telle, que tu ne me sembles pas si flaque, flettri, & debilité par l'aage & maladies que par gourmandise, & yurongnerie.

G. O qu'il la bien depeint de toutes ses couleurs.

P. Et combien qu'il y ait long temps que ie voy par ton sourcil esleué que tu me menasses, ie ne peux toutesfois me taire de ce dont i'ay opinion: i'estime que ce meschant Iules Ethnique est reuenu des Enfers masqué, afin de me voir tant vous ressemblez l'un.

I. Ma



l'autre en toutes choses.

I. Madisi.

P. Qu'a-il dict?

G. Il est courroucé, tous les Cardinaux s'enfuoient de deuant luy, toutesfois & quantes qu'il vsoit de ce langage, autrement il eust fallu sentir ce baston tressainct, principalement apres qu'il auoit banqueté.

P. Tu me sembles tresbien cognoistre la conception de l'entendement de ce personnage, & par ainsi dy-moy qui tu es?

G. Je suis le grand Genie de Iules.

P. Mais le mauuais comme ie croy.

G. Tel que ie suis ie suis à Iules.

I. Que ne laisse tu la ces bourdes, & ouures la porte, si tu ne veux qu'elle soit rompue, Qu'est-il besoin de parler d'auantage? tu vois quelle compagnie ie mene avec moy.

P. Certes ie voydes larrons fort rusez, mais affin que tu le sçaches il te faut forcer ceste porte avec autres armes.

I. Je te dis que ie ietteray cōtre toy le foudre de parolles, par lequel iay quelque fois espouuanté les Roys voire mesmes les Royaumes, tu vois vne bulle toute preste à ceste fin.

P. Quel mauuais foudre, quel tōnerre quelles bulles, quelles ventouses m'allegues-tu? car iamais Christ ne nous a enseigné cela.

I. Mais tu le sentiras si tu n'obeis.

P. Si tu as autrefois estonné quelques vns de ces fumees, cela ne faiét rien maintenant à propos, il se faut aider de choses vrayes: ceste forteresse se gaigne nō par maudifons mais par bienfaicts. Mais ie te prie me menasses tu du foudre d'excommunication, dy moy par quelle raison?

I. Tresbonne, pource que tu n'es qu'un homme priué, & comme un autre prestre du peuple, voire mesmes n'estant point prestre comme n'ayant point de puissance de consacrer.

P. Tu l'entēs pource que ie suis mort comme ie croy.

I. Ouy bien.

P. Mais par ceste raison tu n'es pas meilleur que mort.

I. Au contraire cependant que les Cardinaux debattent de subroger en mon lieu un Pape nouveau, c'est a moy à continuer l'administration.

G. Comme cestui-cy refuse.

I. Mais ie te dis, ouure maintenant.

P. Et ie te dis que si tu ne me racomptes tes merites, rien ne s'en fera.

I. De quels merites parles tu?

P. Ie te le diray. As-tu esté plus excellent que les autres en la cognoissance de la Do-

Erine sacree?

I. Non & n'en auois pas le loisir, estant empesché à tant de guerres. Mais il y a assez de freres prescheurs si cela sert de quelque chose.

P. Donc as-tu acquis plusieurs personnes à Christ par saincteté de vie?

G. Mais bien plustost il en a acquis à l'enfer:

P. As-tu acquis bonne renommee, pour auoir faict des miracles?

I. Tu parles de choses qui ne sont pas en vſage.

P. As-tu prié Dieu continuellement, & d'un cœur pur & net?

I. Quelles sornettes est-ce que cestui-cy groumele.

P. As-tu amaigry ton corps par ieusnes & par veilles?

G. Cesse ie te prie de requerir ces choses de cestui-cy, de peur que tu ne perdes ta peine.

P. Ien'ay point cognu d'autres dons d'un excellent Pontife: s'il en sçait de plus Apostoliques quil les die luy mesmes.

I. Combien que ce soit chose indigne que Iules cydeuant inuincible cōtre tous, cede en rien à Pierre rescheur, & presque mendiant, affin que ie ne die rien d'auantage: Toutesfois affin que tu cognoisses quelrin-

ce tu mesprises escoute en peu de parolles. Premieremēt ie suis de Gennes , & non Iuif comme toy, avec lequel i'ay regret que i'aye cela de commun que i'ay esté quelquefois marinier.

G. Il n'y a pas dequoy ce fascher , y ayant bien à dire de l'un à l'autre: car il estoit pefcheur, affin de pouuoir gagner sa vie, mais tu seruois de ramer pour vn bien petit salaire.

I. Et puis ie suis nepueu du Pape Sixte vraiment Tres-grand.

G. Il entend des vices.

I. Par sa faueur & par mon industrie, premierement i'ay esté esleué aux dignitez Ecclesiastiques. Et puis par degrez au souuerain degré de Cardinal. En après ayant esté tourmenté par plusieurs tēpestes, & agité deça & dela de tresfascheux accidēs, & entre autres maladies subiect au mal caduc, en fin tout couuert de verolle, & encores banny, enuié, condamné, Delaisné d'un chacun & presque desesperé, toutesfois ie n'ay iamais perdu l'esperance de pouuoir paruenir au souuerain Pontificat, telle estoit la magnanimité de mon courage. Au lieu que toy espouuāté par la voix d'une femmelette quitas incontinent tout, vne femme t'auoit fait perdre le courage. Mais vne femme deuine-



resse ou forcierre me l'auoit augmētē laquel-  
 le moy estant enuironné de tant de maux,  
 me dit tout bas en l'oreille, ayes bon coura-  
 ge & poursuis Iulian n'aye point de regret  
 de faire ou endurer quelque chose que ce  
 soit, quelque iour tu seras couronné de tri-  
 ple couronne, & seras le Roy des Roys, &  
 Seigneur des Seigneurs, & mon esperance  
 & sa prediſtion ne m'ont point trompé, & à  
 cela me suis efforcé contre toute esperance,  
 en partie avec l'ayde des François qui m'ont  
 assisté comme i'estois reietté, en partie par le  
 moyen d'une quantité d'argent qui ne se  
 peut estimer, que i'auois recouuré avec grā-  
 de vsure, mais non sans mon industrie.

P. De quelle industrie parles-tu?

I. C'est à sçauoir non sans auoir par accord  
 promis des benefices, & par artifice ayant à  
 ceste fin trouué des cautions, parce que à  
 grande peine Crassus eust-il trouué vne si  
 grāde somme d'argēt. Mais c'est pour neant  
 que ie te raconte ce que tous les banquiers  
 mesmes n'entendent pas, Tu as entendu  
 comme ie suis paruenue au pontificat, auquel  
 ie me suis comporté de telle façon qu'il n'ya  
 personne, ie ne dis pas des anciē Papes (qui  
 me semblent l'auoir esté du tiltre seulēmēt)  
 mais aussi des nouueaux auxquels l'Eglise &  
 Christ ayent plus d'obligation qu'a moy.

G. Comme ceste beste contrefait bien le rodomont?

P. I'entens que tu me dies a quoy tu veux tendre.

I. Car ayât cree plusieurs nouveaux offices (que l'on appelle ainsi) i'ay grandemēt augmenté le Domaine de la Papauté. En outre i'ay trouué le moyen que sans encourir le vice de simonie, les Eueschez s'achetoient. Car il a esté ordonné par nos predecesseurs, que celuy auquel on a conseré vn Euesché quitte sō office: ce que i'interpretay de ceste façon, il n'est commandé de quitter, mais on ne quitte pas ce que l'on n'a point. Il faut donc achepter ce que l'ōpuisse quitter. Par ce moyen chacun Euesché m'apportoit incontinent six ou sept mil ducats: outre ce que lon tiroit pour l'expedition des bulles. plus i'ay tiré vn grand profit de la nouvelle monnoie que i'ay espādūe par toute l'Italie & n'ay laissé encor occasion qui peut seruir pour amasser des finances scahant bien que sans icelles, aucune chose soit sacree soit prophane, ne se pourroit biē paracheuer. Et pour venir aux choses de plus grande consequence, i'ay remis au Domaine du siege R. Boulōgne, de laquelle les Boulōnois s'estoiēt enparéz: i'ai vaincu par armes les Venitiēs, qui n'auoient esté vaincus par aucuns au-

tres. J'auois presque attiré au filé le Duc de Ferrare, qui auoit esté fort tourmenté de guerre. Je me suis heureusement depestré de ce petit conciliabule schismatic, faisant semblant de conuoquer vn autre concille, repoussant par ce moyen comme l'on dit vn cloud par l'autre. Finallemēt i'ay dechassé de toute l'Italie les Frâcois alors redoutables a tout l'vuiuers. Et pareillement en eusse aussi dechassé les Espagnols: car ie m'y preparois, si ie ne fusse mort. Mais regarde quel courage inuincible i'ay mōstré, les François estans les plus forts, ie commençay a prendre garde ou ie me pourrois mettre à labry. Je laissois croistre ma barbe blanche, toutes choses estans presque desesperées, lors que l'on apporta vne nouuelle vrayemēt d'or, qu'au terroir de Rauenne on auoit defaict & tué quelques milliers de François: a lors Iules cōmença à respirer. D'auantage par trois iours ie fus presque estimé pour mort, & moy-mesmes le croiois ainsi. Et lors derechef contre mon esperance & d'vn chacun ie reuins à conualescence. Mon autorité donc ou finesse a tellement profité qu'il n'y a Roy en la Chrestienté que ie n'aye esmeu à la guerre, en rompant & annulant tous les accords, traictez, & alliances, par lesquelles ils s'estoient estroictement recon-



ciliez ensemble: Mesmes le dernier traitté  
 faict à Câbray, entre moy, les Roys de Frâce  
 & des Romains, ayant esté tellement cassé  
 & aboli que iamais il n'en a esté faict aucune  
 mention. Outre tout cela combien que iaye  
 entretenu vne si grande armee, embelli de si  
 tres-beaux triôphes, faict représenter tât de  
 ieux, edifié en tant d'endroiçts, toutesfois  
 lors que ie suis mort, i'ay encor laissé cinq  
 millions de ducats: Et eusses faict beaucoup  
 de plus grâdes choses, si ce medecin Iuif qui  
 par son art m'auoit long temps prolongé la  
 vie l'eust peu encor allonger d'auâtage. Que  
 pleust à Dieu que quelque Magicien me  
 peust faire retourner en vie; afin que ie  
 peusse acheuer, & mettre fin à mes belles en-  
 treprises: Combienque en mourant i'ay dili-  
 gemment donné ordre que l'on ne peust ac-  
 corder les guerres que i'ay esmeues. En fin  
 i'ay mis peine que les finances fussent seule-  
 ment employées à cest vsage, ça esté la der-  
 niere parolle lors que l'ame est sortie de ce  
 corps. Maintenant as-tu regret d'ouurir la  
 porte de Christ, à celuy auquel Christ & l'E-  
 glise sont si bien obligez, & tenus? Et celuy  
 la s'esmerueillera d'auâtage de cela, qui con-  
 syderera que i'ay mis fin a telles affaires, par  
 la seule vertu de mō esprit, sans l'ayde d'au-  
 truy, comme font les autres: non par la No-  
 bleſſe



blesse anciēneté de nostre maisō veu que ie ne cognois pas seulemēt mon pere, ce que ie dis pour me glorifier dauantage : Non par ma beauté, veu que chacū qui void mō visage, qui semble vn masque, en a frayeur, Non par les lettres, desquelles ie n'ay eu aucune cognoissance, Non par la force du corps, qui est tel que iel'ay cy deuant descript, Non par la faueur de mon aage, car i'estois desia viel quand i'ay faict ces choses. Non pour porter affection au peuple, car il n'y auoit personne qui ne me haïst. Non par clemence & douceur, veu que i'ay esté inexorable : De telle façon que i'ay mesme vsé de cruauté vers ceux ausquels les autres ont accoustumé de permettre tout.

P. Que veut dire cecy?

I. Mais la fortune m'estant contraire, laage, le corps, & en somme les Dieux, & les hommes, estant seulement appuyé sur les conceptions de mon esprit, & sur mes finances ie suis venu à bout en peu d'annees de si grandes choses, laissant a la posterité si belle matiere, qu'elle aura dequoy s'employer voire iusques à dix ans entiers. Je dis ces choses de moy non seulement tres veritablement mais aussi tres-modestement lesquelles ou elles seroyent parées de ces ornements, par ceux qui auoient accoustumé de

parler deuant moy, tu entendrois parler vn Dieu, & non pas vn homme.

P. O homme de guerre inuincible, pour ce que tout ce que tu me racomptes m'est incognu & nouveau, ie te prie que tu accordes cela ou à mon estonnement, ou à mon ignorâce, qu'il ne te soit point ennuyeux de me respondre à chacune chose dont ie t'interrogeray plus grossierement. Qui sont ceux cy qui ont vne si grande blancheur, & vne perruque?

I. Se sont ceux que i'entretenois pour mon plaisir.

P. Qui sont ces basanés & pleins de cicatrices.

I. Ce sont Soldats & Capitaines, qui pour moy, & l'Eglise sont vaillamment morts en la guerre, les vns en forçant Boulongne, les autres en la bataille contre les Venitiens, & quelques vns à Rauenne : A tous lesquels par accord des indulgences le Ciel est deu car long-temps y à que par grandes bulles i'ay promis que tous ceux qui combatroient soubz l'enseigne de Iules, s'enuoleroient tout droit en Paradis, quelque vie qu'ilz eussent menée au parauant.

P. Pour ceste occasion, autant que ie peux coniecturer, du nombre de ceux la estoiet ceux qui souuentes-fois deuant que tu arri-

uasses icy m'importunoient fort, me montrant seulement des bulles de plomb sans toutes-fois vouloit entrer de force.

I. Donc tu n'as daigné les laisser encor comme ie peux comprendre par tes propos.

P. Moy ie n'en ay laissé encor pas vn de ce calibre. Christ ne ma pas ainsi enseigné qu'il faillust ouurir ceste porte a ceux qui apportent des bulles de plomb pesantes. Mais bien qui reueltoient ceux qui estoient nudz, qui ont donné à manger a ceux qui auoient faim, donné à boire à ceux qui auoient soif, visité les captifs, & prisonniers, recueilly les estrangers, car s'il à voulu que l'on reiettaît ceux qui ont Prophetisé en son nō, qui ont ietté hors les diables, qui ont fait des miracles, estimes tu que ceux doiuent entrer & estre adinis, qui apportent seulement vne Bulle au nom de Iules?

I. Que si tu l'eusse sceu.

P. Je t'entens bien si quelqu'un reuenant d'Enfer te fust venu dire ces nouuelles, tu m'eusse denoncé la guerre.

I. Voire & t'eusse mesmes excommunié.

P. Mais poursuy pourquoy toy mesme es tu armé.

I. Comme si tu ne scauois pas quel vn & l'autre glaue appartient au Pape, ou si tu ne voulois que ie fisse la guerre estant tout nud.

P. Certainement lors que i'estois en ce lieu, ie n'ay eu cognoissance d'aucun glaiue, sinõ de celuy de l'esprit, qui est la parolle de Dieu.

I. Mais Malchus ne dit pas de mesme, auquel comme ie croy tu as couppé l'aureille sans armes.

P. Il m'en souuient & le recognois, mais alors ie cõbattois pour Christ mon maistre, & non pas pour moy, pour la vie du Seigneur & non pas pour de l'argent ou Seigneurie seculiere: ie combattois n'estant point pour lors Pape, pour ce que les clefs m'estoient seulement promises, & non pas acceptées n'ayant encore receu le saint Esprit, & toutes-fois il m'a esté commandé de remettre le glaiue en son lieu, & ay esté admonesté que ceste espee de combat n'est pas seante aux Prestres voire mesme aux Chrestiens. Mais nous parlerons de cecy vne autrefois. Pourquoi est-ce que si soigneusement tu te renommes estre venu de Gennes, Comme si cela appartenoit en aucune chose à vn Lieutenant ou vicaire de Christ de quelle nation il soit venu.

I. Mais plustost i'estime que c'est vne grãde pieté, d'annoblir nostre pays, & pour ceste occasion ie fais grauer, ou escrire ce



Tiltre à toutes les monnoyes, Images, vouf-  
tes & murailles.

P. Et donc celuy qui ne cognois point  
son pere, peut il auoir cognoiffance de son  
pays. Mais moy au commencement i'esti-  
mois que tu parlaffes de la cœleste Ierusalē,  
des croyans, & de son feul Prince, par le-  
quel ils defirent estre sanctifiez, c'est à dire  
efclairez par fa diuinité. Mais tu adiouftes  
que tu es nepueu du Pape Sixte de par fa  
fœur, duquel homme ie m'esmerueille qu'il  
n'est onc venu par deça, principallemēt veu  
qu'il a esté Pape, & ton Parent, à toy qui es  
fi grād Capitaine, parquoy dy moy quel hō-  
me ça esté; à il esté Prestre?

I. Mais plustost vn bon gendarme, & de  
plus d'vne excellente Religion assauoir de  
l'ordre de S. François.

P. Certes i ay veu vn qui se nōmoit Fran-  
çois tres-bonne personne entre les layz, qui  
mesprisoit les richesses, la volupté, & l'Am-  
bition, Ce pauvre homme à il maintenant  
de telz satrapes.

I. A ce que ie voy tu ne voudrois pas que  
quelqu'vn s'aduanfast en mieux, Benedic  
estoit aussi pauvre, toutes-fois sa posterité  
est si riche & opulante, que nous mesmes  
luy portons enuie.

P. C'est bien dict. Mais reuenons à ce que

tu as dict, que tu estois nepueu du Pape Sixte de par sa sœur?

I. I'ay faict cela expres, affin que ie bouche la bouche à ceux qui disent & affermēt trop librement que ie suis son fils.

P. Librement? mais n'est-ce point vrayement?

I. Mais cela n'est pas seant à la dignité Pontificalle, à laquelle il faut par tout auoir esgard.

P. Mais il semble que lors elle aura tres-bien esgard à soy, si elle ne faict rien que l'on luy puisse iustement reprocher or ie te coniure par la Majesté Papalle, est-ce la maintenant le chemin ordinaire & cousturier, pour pauenir au grand Pontificat

I. Il y a quelques siecles qu'il n'y en a point eu d'autres, si d'auanture celuy qui sera mon successeur n'est crée par autre moyen. Car moy mesme estant admis au souuerain Pontificat, ay ordonné par vne Bulle de laquelle on doit auoir crainte, que personne ne paruint à cest honneur par tels moyens, & ay renouuellé ceste Bulle peu au parauāt ma mort, les autres verront de quoy elle pourra seruir.

P. I'estime que persōne ne pourroit mieux dechiffrer ce mal, mais ie m'esmerueille qu'il se puisse trouuer quelqu'un qui veille recep-

voir ceste charge principalement veu qu'il est subiect à tant d'empeschemens, & qu'il y à tant d'affaires pour y paruenir, car moy estant Pape, à grand peine quelqu'un pouuoit estre contraint par force qu'il se chargeast de l'honneur d'estre Prestre ou diacre.

I. Cela n'est pas de merueilles car en ce tēps la, l'estat, le reuenu, & le salaire des Euesques, n'estoit autre chose que traualx, veilles ieunes, & doctrines, & bien souuent la mort. Maintenant c'est vn regne, & vne tyrannie: & qui est celuy qui ne combattroit pour vn Royaume s'il auoit esperance d'y paruenir.

P. Mais or sus dy moy qu'auoit faict Boulongne c'estoit elle reuoltée de la Foy, qu'il ait fallu qu'elle ait esté remise au domaine du siege Romain?

I. Cest bien parlé il n'estoit pas question de cela.

P. Paraduantage la republique se corrompoit & gastoit à cause du mauuais gouuernement de Bentiuele.

I. Mais plustost ceste cité florissoit & estoit augmentée & embellie de plusieurs edifices, & pour ceste occasion ie taschois de tant plus à la recouurer.

P. Le vous entens c'estoit contre droit & raison qu'il l'auoit enuahie.

I. Ce n'estoit mesme pas cela, il l'auoit eue par accord

P. Les Citoyens donc ne pouuoient endurer vn tel Prince.

I. Au contraire ils le retenoient à toute force, & quant à moy ils me reiettoiet presque tous.

P. Qu'elle cause y auoit il donc?

I. Pource qu'il administroit tellement sa charge que de l'argent qu'il recueilloit de la Cité à grand peine vne petite partie en reuenoit en nostre domaine. D'auantage il estoit expedient que cela se fist, pour paruenir à ce que ie proiectois en mon esprit, partant avec l'aide des François, & ayant menassé quelques vns par mon foudre, & destruiet les Bentiuolles, i'ay baillé la charge de la ville aux Cardinaux & Euesques, afin qu'il n'y eust pas vne partie du profit & emolument qui ne vint à l'Eglise Romaine, outre ce il sembloit que le tiltre & la dignité del'Empire leur appartenoit. Maintenant on void par tout nos portraits & statues, on lit nos tiltres, on adore nos trophées, & pour ceste occasion d'un costé & d'autre on peut veoir Iules debout d'airin, & de pierre. Finalement si tu eusses veu en quel royal triomphe ie suis entré à Boulongne, parauanture mespriserois tu ceux des Octauiens & Scipions



& Scipions, & scaurois que ce n'est pas sans cause que j'ay si songneusement & diligemment combattu, pour recouurer Boulougne, & eusses au vray veu en mesme temps l'Eglise militante & triomfante.

P. Donc durant ton regne, selon que ie peux entendre, il est aduenue de prier ce que Christ nous auoit commandé, ton regne aduienne, mais quant aux Venitiens qu'auoient ils fait de mal?

I. Premièrement ils se comportoient à la façon des Grecs, & me tenoient presque comme vn qui refuse, & radotte, ne laissant aucunes sortes d'iniures dont ils ne me difamassent.

P. Estoient elles vrayes ou faulces?

I. A quoy sert de demander cela, car soit l'un soit l'autre, c'est sacrilege d'en parler seulement entre ses dents, si ce n'est à la louange du Pape, d'auantage ils donnoient les benefices selon qu'il leur plaisoit, & ne permettoient pas quel'on vint plaider à Rome ils n'acheptoient aucunes dispêces, que faut il d'oc dire d'auantage? ils assiegeoient le siege de Rome par pertes insupportables, s'estant en outre emparez d'une bonne partie de ton patrimoine.

P. De mon patrimoine, de quel patrimoine ie te prie parles tu, moy qui ay e-

stant tout nud fuiui Christ, qui aussi estoit tout nud.

I. Je te parle de quelques villes qui appartiennent au siege de Rome, car il à pleu aux tres-saincts peres, appeller ainsi la part & portion des heritages qui leur appartenoient.

P. Certainement vous faiçtes bien voz affaires, voire mesmes avec mon diffame, Appelles tu cela vne perte qui ne se peut supporter?

I. pourquoy non?

P. Mais les mœurs estoient elles corrompues la pieté estoit elle refroidie?

I. Va ten, tu parle de choses friuoles? Mais plustost on nous faisoit perdre infinis milliers de ducats. qui eussent peu suffire a entretenir vne legion de gens de guerre.

P. Cela vrayement est vne grande perte à vn vsurier, quant au Ferrarois qu'auoit il fait de nouveau.

I. Quoy? cest homme le plus ingrat de tous les hommes. Alexandre luy auoit fait c'est honneur (encor qu'il fust homme de basse condition) de luy auoir baillé à femme l'vne de ses filles, cependant oubliant vne si grande courtoisie il ne faisoit autre chose que me diffamer m'appelant simoniaque & amoureux des enfans. Disant que i'estois vn

homme remuant, & d'auantage il s'attribuoit quelques tributs, lesquels biẽ qu'ils ne fussent pas trop grands n'estoient neantmoins à negliger à vn pasteur diligent.

G. Mais plustost a vn marchand.

I. outre ce qui plus vrayemẽt appartient & est considerable en cest affaire il estoit expedient a ce que i'auois resolu de faire que ces choses fussent iointes a la seigneurie de mon Empire, a cause de la , commodité de la situation, Par ainsi i'ay tasché mettant cestuy cy dehors dõner ceste seigneurie a mon parent, hõme vaillant & diligẽt & qui entreprendroit toutes choses pour la dignité de l'Eglise, comme celuy qui n'a pas long tẽps en nostre faueur auoit tué le Cardinal de Paule. Car le mary de ma fille est & ce tient pour contant de ce qu'il possede.

P. Qu'est-ce que ientens les Papes ont ils des femmes:& enfans?

I. Il est vray qu'ils n'ont point de femmes, mais au Regard des enfans est-ce chose eõtre nature s'il en ont, veu qu'ils sont hõmes & non pas chastrez;

P. Mais en fin pour qu'elle occasion à esté assemblé ce conciliabulle schismatique?

I. Il seroit tres malaisé de discourir de ceste affaire des sa premiere origine, ie te le diray sommairement, plusieurs se commençoient



a ennuyer de la court de Rome : Ils' disoient que toutes choses estoient souillees par gain deshonneste , monstrueusses & meschantes paillardisses, époisonnemēs, sacrileges, meurtres, simonies & marchandises & m'appelloiēt simoniaque, yurōgne, deshōneste, enflé d'un Esprit qui aspire aux choses de ce monde, & qui n'estois emparé de ce lieu, j'ay avec grand d'ommage de tout la Republicque Chrestienne combien que en toutes façons i'en fusse indigne , par ainsi qu'il falloit par vn Concile general donner ordre a ces choses si mal réglées. Ils adioustoient que i'auois promis par serment qu'apres que i'aurois receu c'est honneur dedans deux ans ie ferois assembler le Concile general, & que i'ay esté crée Pape à ceste condition.

P. A il esté au vray ainsi dit?

I. Il est ainsi & ainsi a esté fait, mais moy mesmes quand il m'a semblé bon me suis dispensé de ce serment. Et qui est-ce qui doute de iurer & affermer quelque chose que ce soit quand il est question d'un Royaume, en autres choses, il faut auoir en reuerce la pieté cōme disoit ce Iules vn autre moy mesme. Mais regarde l'audace & hardiesse des hommes, voy ou ils tendoient, neuf Cardinaux se separeront d'avec moy. Ils me font assauoir le Concile qu'ils assem-



bloient, ie suis par eux semond de m'y trouuer, me prient que i'y preside, ne le pouuant obtenir, ils le denoncent à vn chacun sous l'autorité de Maximilian comme Empereur ( parce que les histoires tesmoignent qu'anciennement le Concile debuoit estre assemblé par les Empereurs Romains ) & encor de l'autorité de Louys douziesme Roy de France. Je fremis du tout en le redisant, ils taschent de mettre en pieces la robe de Christ qui estoit sans cousture , laquelle ceux mesmes qui ont crucifié Christ, ont coseruee entiere.

P. Estois tu tel que ceux cy disoient?

I. Que sert cela i'estois souuerain pontife ie veux que les souuerains pontifes soient plus meschans que les Cercopes, plus fols que Morichus, plus ignorant qu'une Busche de bois, plus ords & sales que le lac lerna, cependant il faut que celuy qui tient ceste clef de puissance soit respecté comme lieutenant de Christ, & le faut auoir en admiration comme tressainct.

P. Voire quād il seroit ouuertemēt meschāt?

I. Voire quand ce seroit tres-apertement, & ne faut pas endurer, que celuy la qui estant Lieutenant de Dieu en terre, se monstre du tout estre quelque Dieu entre les hommes, soit repris ou outragé d'iniures,

par quelque petit bon hommeau.

p. Mais à cela contredit le sens commun que nous ayons bonne opinion de celuy que nous voyons tout publicquement estre meschant, ou que nous parlions bien de celuy duquel nous auons mauuaise opinion,

I. Que chacun en pense ce qu'il voudra, pourueu qu'il en parle en bien, ou qu'il se taie, nais le pape ne peut estre repris mesme par le Concile.

p. C'est vne chose que ie sçay bien que celuy qui tient la place de Dieu en terre doit estre semblable à luy en tant qu'il luy sera possible, & passer sa vie de telle façon que l'on ne puisse à bon droit mal parler de luy, Mais les affaires des papes ne se pourroient bien porter, si par force plustost que par bien faits ils obtiennent que les hommes parlent d'eux en bien, parce que vous ne pouuez louer sinon en mourant ceux desquels la grâde gloire est le silence d'hommes qui ont mauuais estime d'eux ? Mais respons moy à cela, n'est il pas possible & ne peut on aucunement destituer vn Pape de sa charge estant homme pestifere & plein de meschanceté?

I. C'est chose ridicule, car qui pourroit estre depose? celuy qui est souuerain.

p. Mais plustost puis qu'il est souuerain de-

uroit il estre depofé, car autrement qu'elle pauvre & miferable condition feroit-ce de l'Eglife qu'elle fut cōtrainte de fupporter vn pape qui renuerfe tout s'en deffus deffous, Et qu'elle ne puiſſe dechaffer vne peſte publique?

I. Mais ſi le pape doit estre corrigé il faut que ce ſoit par le Concile. Or ce concile ne doit estre aſſemblé ſans le vouloir du pape, autrement ſe feroit vn conciliabulle, & non pas Concile, & quand bien il feroit aſſemblé l'on ne peut rien ordonner contre la voionté & intention du pape, enfin c'eſt le dernier refuge qui eſt la ſouuerainne puiſſance, par laquelle vn pape eſt bien loing par deſſus tout le concile, & ne peut estre dechaffé de ſa charge pour aucun crime.

P. Ne pour homicide.

I. Ne pour paricide.

P. Ne pour paillardife?

I. C'eſt bien parlé, non pas pour inceſte meſme.

P. Ne pour l'impieté ſimoniaque?

I. Non pas pour fix cens

P. Ne pour empoifonnement?

I. Non pas pour ſacrilege.

P. Ne pour blaſpheme?

I. Non ie te le dis,

P. Ne pour tes vices aſſemblez cōme en

creux.

I. Adiouste si tu veux six cens noms de meschanceté, encor plus sales & ords, le pape pour cela ne peut estre dechassé de son lieu.

P. Tu me racompres vne nouuelle dignité du pape Romain: car il est a luy seul permis d'estre tres-meschant, sans encourir aucune punition. Mais c'est plustost vn nouveau malheur de l'Eglise, si elle ne se peut depefcher d'vn tel monstre, & soit contrainte d'adorer & faire honneur à vn tel pontife, de la sorte duquel on ne pourroit endurer vn pal-frenier.

I. Quelques vns disent que pour vn crime on le peut demettre.

P. Ie te prie pour quel bien fait? car pour des meschâcetes il ne le peut estre, puis qu'il ne le peut estre pour ceux que tu as maintenant deduits.

I. pour le crime d'heresie, mais lors seulemēt qu'il est publiquement conuaincu, cepēdāt cela est de nulle valeur, & ne peut nuire tāt soit peu a la Maieſté pontificalle car premierement il est en sa puissance d'abolir & annuller la loy si elle ne luy plaist, d'auantage qui est ce qui ose accuser le pape, & principalement ayāt de si grandes armées oultre, ce s'il est d'auanture pressé par le Concile, il est

aisé de



aisé de se retracter sil ne la point nié, finalement il y a mille eschappatoires par le moyen desquelles il se peut despestrer s'il n'est du tout vne souche de bois & non pas homme.

P. Mais par la dignité pontificalle dy moy qui est-ce qui a fait ces belles loix?

I. Quel autre les peut auoir faictes sinon le Pape de Rome, qui est la fontaine & origine des loix? Mais c'est a luy mesme a annuler, interpreter, restraindre, & l'estendre selon qu'il verra que cela luy pourra seruir.

P. l'Heureux pape, s'il peut faire vne loy, par laquelle il se puisse mocquer, non seulement de Dieu, mais aussi du concile: Combien que vn concile ne seroit tant a desirer contre vn tel pape, que la commune armee de pierres, affin qu'elle ostant du milieu de nous, vn pape tel que tu l'as maintenant peint meschant tout ouuertement, yrongne, homicide, simoniaque, empoisonneur, parjure, rauisseur souillé de toutes parts despectes monstreuses de paillardises, & cela deuant tout le monde. Mais dis moy qui a il pourquoy le pape a si grande crainte & horreur du Concile?

I. Que ne demandes tu la mesme chose aux Monarques: pourquoy ils hayent le senat & honorables assemblees; à scauoir que

par la frequēce de si excellens personnages ,  
 la dignité Royale perd aucunemēt son lu-  
 stre: les lettres apportēt vne hardiesse a ceux  
 qui sont doctes, ceux qui ont bone consciē-  
 ce parlent plus libřement qu'il ne nous est  
 expedient, ceux qui sont esleuez aux digni-  
 tez vsent de leur autorité, il y en a quel-  
 ques vns qui s'atordēt avec ceux cy, lesquels  
 ont enuie a nostre gloire & apportent vn tel  
 preiugé en leur esprit, qu'ils taschēt d'amoĩ-  
 drir & les moiens, & l'autorité du pape. da-  
 uātage personne n'a la seance qui n'estime, a-  
 uoir quelque chose a dire cōtre le pape, sous  
 pretexte du Concile, partant a grand peine  
 aucun Concile a il si heureusement rencon-  
 tré que le Pape n'ait senty quelque chose a  
 dire de sa M. & ne s'en soit retourné moins  
 que souuerain de laquelle chose tu peux  
 mesmes estre tesmoin. Car encores qu'il fust  
 question de choses bien cogneües non pas  
 des Empires & reuenus Royaux toutesfois  
 S. Iacques a bien osé adiouter quelque cho-  
 se a ton aduis : car comēte ainsi soit que tu  
 fusses d'aduis de deliurer en tout & partout  
 les gentils de la charge de la loy Mosaique,  
 Sainct Iacques, parlant apres excepta la  
 paillardise & le sang & les choses sacrifices  
 aux idolles, cōme corrigeant ton aduis, Tél-  
 lement qu'il y en a aujourd'huy qui esmeus

de cela estiment que l'autorité du souuerain pontife a appartenu a Saint Iacques & non pas a toy.

P. Tu estimes donc qu'il faut seulement pouruoir a ce que la Maiesté Royale du Pape demeure en son entier, & nō pas plutost l'utilité de la chose publique chrestienne.

I. Chacun pouruoir a son affaire, nous auōs ainsi soin de la nostre.

P. Mais si Christ eust ainsi fait il n'auroit plus d'Eglise, de laquelle tu te vantes estre Monarque, & ne voy point comment cela puisse estre seant a vn qui prend plaisir d'estre appellé vicaire de Christ, de suiure choses cōtraires à Christ, mais depesche toy de me dire par quel artifice tu as faict cesser ce Concile schismatique comme tu l'appelles?

I. Sans faute ie te le diray, entens le si tu peux: En premier lieu lors que l'Empereur Maximilian par solennels messages eut cōuoqué le Concile, ie l'ay faict desister de son entreprise par des moyēs qui ne doiuent point estre rememorez, d'auantage par mesme artifice i'ay persuadé à quelques Cardinaux qu'ē presence de Nottaires & tesmoins ilz deniasent ce que au parauant ils auoient arresté & ordonné par instruments publics.

P. Cela est il licite?

I. Pourquoi non lors que le Pape l'ap-



prouue?

P. Quoy donc le serment ne sera point serment s'il le veut ainsi puis qu'il en dispence ceux qu'il luy plaist?

I. Mais pour le dire franchement c'estoit vn petit trop impudemment faict, mais il ne se presentoit point de moyen d'y pouruoir plus à propos, puis voyant que i'attirois l'enuie de quelques vns du Concile, principalement à cause qu'il estoit tellement conuocé que ie n'en estois pas exclus, mais plustost y estois appelé & prié de presider, regarde quelle tomperie i'ay trouuée suivant l'exemple de mes predecesseurs, moy à mon tour les appelle au Concile à Pise prenant mon pretexte sur ce que n'i le temps n'i le lieu qu'ils auoient assigné n'estoient assez commodés, & aussi tost ie conuocé le Concile a Rome où i'estimois que personne ne viendrait qui ne fut amy de Iules, ou pour le moins qui ne m'obeist : ce que i'auois assez donné à entendre par plusieurs exemples & tout incontinent ie crée plusieurs Cardinaux qui secondoient mes entreprises.

G. C'est a dire qui estoient tres-meschâts.

I. D'auantage si ie n'eusse conuocé ce Concile il n'y en eust point eü, & ce pendãt il n'estoit pas expedient pour mes affaires,



qu'un si grand nombre d'Euesques & Abbez arriuaft, entre lesquelz il estoit impossible qu'il n'i eust quelque gens de biẽ & deuotz. Par ainsi ie leur remonstře, qu'ils ne fissent point de frais, & que chacune prouince en enuoyast seulement vn ou deux, & puis cela ne me sembloit assez seur, parce que peu de personnes de tant de Prouinces reuiendroient à vn grand nombre, derechef ie leur fis sçauoir lors qu'ils estoient ià en chemin qu'ils ne vinssent pas, & qu'il falloit remettre le Concile à vn autre temps, controuuant à ceste fin des causes tellement quellement probables, & par ce moyen ayant dechassé les vns & les autres, de rechef en aduançant le iour que i'auois ordonné i'assigné le Concile à Rome avec ceux que i'aucis preparez à ceste fin, entre lesquels s'il y auoit quelques vns qui fussent d'aduis contraire au mien toutes-fois ie tenois cela pour chose certaine, que personne ne me contrediroit, estant assisté de tant de gardes & armes, par ce moyen ie fus cause que l'on porta vne grande enuie à ce Concile de l'Eglise Gallicane, enuoyant deçà & delà des lettres par lesquelles ie faisois maintien de nostre sacré Concile, maudissant le leur, le nommant souuēt la petite assemblée de Satan, le Conciliabule du diable, la conspira-

tion schismatique.

P. Il falloit que les Cardinaux auteurs & principaux du Concile fussent tresmechâts.

I. Je ne me plains pas des meurs, mais le principal de toute l'affaire fut le Cardinal de Rouën, qui par ie ne sçay qu'elle sainteté a tousiours tēdu à ce but qu'il rendist l'Eglise plus reformée, de la fait en quelques endrois la mort me la osté me faisant lors vne chose tres-agreable, & luy succeda le Cardinal du tiltre de sainte croix Espagnol d'une vie à laquelle il n'y auoit que redire, mais qui n'estoit pas aisé à flechir, & qui estoit Theologien: lequel genre d'hommes à de coustume d'estre contraire aux Papes.

P. Mais cet homme Theologien n'auoit il rien qu'il peut probablement mettre en en auant pour colorer ce qu'il faisoit.

I. Il disoit beaucoup de choses, que les maladies de l'Eglise n'auoient iamais esté si intolerables. Partant qu'il y falloit donner ordre par vn Concile general: Que lors que i'ay esté receu au souuerain Pontificat, l'auois promis par serment que la seconde année de mon Pontificat i'assemblerois le Cōcile, sans pouuoir estre dispensé de ce serment voire mesmes du consentement des Cardinaux: Dauantage que souuentes-fois i'en auois esté admonesté & prié par les fre-

res Cardinaux ; que i'en auois esté sômé par les princes , mais que plustost i'auois entêdu a toute autre chose qu'à cela. Ils alleguoient les exêples des cōciles precedēs. Et de quelques canons , par lesquels ils monstroient que ie refusois le concile , que le droit de le conuoquer leur appartenoit , & que du consentement de tous les autres Princes, ce droit appartenoit à l'Empereur de Rome qui anciennement le conuoquoit tout seul, & au Roy de France qui estoit le principal entre les autres Princes.

P. N'escriuoient ils point contre toy choses meschantes à racompter.

I. Mais plustost ces pendars estoient plus sages en cet endroit que ie n'eusse voulu ils manioient vne chose fort odieuse d'une merueilleuse modestie : & non seulement se gardoient de mesdire de moy , mais aussi ne parloient iamais de moy qu'avec honneur, me prians & reprians par toutes choses sacrées & pieuses , que ie presidasse au Concile qui estoit conuoqué comme , chose digne de moy , & que i'auois promise par serment. Et qu'ensemble nous apportassions tout ce qui nous seroit possible pour remettre en meilleur estat les maux de l'Eglise , & ne peut on dire combien de mauuaise reputation cela m'a apporté , principalement a



cause qu'ils verifioient ce qu'ils mettoient en auant par les saintes Escritures: & apparoiſſoit qu'il falloit que gens doctes y euſſent mis la main, ils adiouſtoient à cela des ieunes, des oraiſons, & vne merueilleuſe ſobrieté en leur vie, de façon qu'ils me ſurmontoient meſmes par l'opiniõ de ſaincteté.

P. Et toy au contraire, par quel moyen & raiſon auois tu conuoqué le Concile?

I. Auec vn pretexte fort plauiſible ie mettois en auant que i'auois reſolu en mon Eſprit de corriger le chef de l'Egliſe, c'eſt à dire moy meſmes, puis apres les Princes Chreſtiens, en fin tout le peuple.

P. Tu me racomptes vne fort belle Comedie mais i'en attens la fin. Et ay enuie d'entendre que ceſt que ces Theologiens ont ordonné en ce conciliabule de ſatan.

I. Aſſauoir choſes indignes, & deteſtables mon eſprit à horreur de les redire.

P. Le te prie eſtoit-ce choſes meſchantes?

I. Du tout meſchantes, ſacrilege, plus que heretique, auſquelles ſi ie n'eufſe donné ordre par ma puiſſance, voire meſmes par armes, & par ma ſubilité deſprit, c'eſtoit fait de la dignité de l'Egliſe Chreſtienne.

P. Ceſt pourquoy i'attends avec plus grande attention ce que c'eſt.

I. J'ay horreur en le rapportant, ces meſchants



chants en vouloient venir la, que l'Eglise  
 qui florist par le moyen de tant de richesses  
 & Seigneuries fust reduitte aux antiënes or-  
 dures & sobrieté que les cardinaux qui par  
 vne grande suite de seruiteurs domestiques  
 ont plus d'apparence que les tyrans fussent  
 reduits a pauuretés que les Euesques vescu-  
 sent plus escharcement qu'il eussent moins  
 de seruiteurs & de cheuaux, ils auoient or-  
 donné que les cardinaux ne possedassēt tāt  
 d'eueschez lesquels s'il leur estoit possible en  
 en accumuleroient volontiers a tort & a  
 droict iusques a six cens, ce qui debuoit estre  
 corrigé, & ordonné qu'ilz se cōtentrassent de  
 tel reuenue qui pourroit suffire a vn prestre  
 sobre. Que l'ō ne peust créer vn Pape, Eues-  
 que, ou prestre, par presens, faueur ou serui-  
 ces d'eshonneur, mais seulement selon le  
 merite de la vie, & que si quelqu'un y estoit  
 pourueu par ce moyen qu'il fust degradé,  
 qu'il fust permis de dechasser le Pape ouuer-  
 tement meschant? Que les Euesques pail-  
 lards, & yurongnes fussent priuez de leur  
 administration, que les Prestres aussi ou-  
 uertement meschans nō seulement fussent  
 decheuz du degre de prestre, mais aussi fus-  
 sent punis corporellement, & beaucoup  
 d'autres choses semblables, Mais i'ay regret  
 de dire tout, qui ne tendoit à autre chose

finõ que nous fussions chargez de sainteté,  
& dechargez & depouillez de nos richesses  
& de nostre Empire.

P. Qu'est-ce qu'au contraire il fut ordonné en ce Sacrosainct Concile de Rome?

I. Il semble Aduis que tu ayez oublié ce que i'ay dit que ie ne uoulois faire autre chose sous ombre du Concile, sinon que ie repoussasse vn cloud par l'autre la premiere session & assemblée se passa en certaines ceremonies qui nous ont esté laissées par l'antiquité, lesquelles il nous plaist de garder quand ce ne seroit qu'a cause de l'ancienneté combien qu'elles ne seruent de rien, l'on celebre deux messes, l'vne de la sainte croix, l'autre du saint Esprit, comme si l'affaire se poursuiuoit a son inspiration, par apres il fut prononcé vne harangue pleine de mes louanges, à la subsequente session & assemblée ie fulminé de toute ma puissance contre ces Cardinaux schismatiques, declarant plus que meschant sacrilege, heretique, tout ce qui auoit esté par eux ordonné, ou qu'ils s'efforçoient d'ordonner. A la troisieme session & assemblée, i'espouuenté la France de mesme foudre, en ostant les foires de Lyon & les remettant ailleurs, exceptant nommement quelques endroits, afin que par ce moyen i'estrangeas-

se les esprits du peuple d'avec le Roy, & que i'esmeusse vne sedition entr'eux : & afin que ces choses eussent plus d'auctorité, ie les fis sçauoir par mes bulles a tous le princes principalement a ceux que ie voyois estre plus enclins à nostre party

P. Mais n'a il rien esté fait d'auantage?

I. Ce que ie voulois a esté fait: i'ay gaigné pourueu que nos decrets soient vallables. par publiques ceremonie i'ay despouillé de l'honneur de Cardinal ces trois Cardinaux qui persistoient en leur entreprises i'ay donné le reuenu de leur benefices a d'autres, & afin qu'ils ne puissent facilement estre remis en leur entier, ie les liuré à Satan. Mais plus volontiers ie les eusse fait brusler s'ils fussent tombez entre mes mains.

P. Et toutes-fois si tu dis vray il semble que les decrets de ce conciliabule schismatique sôt plus saincts que du tiē sacrosainct, d'ou ie n'ay encor rien veu venir que des menasses tyranniques maudissons & cruauté meslée avec finesse. Si Satan à esté de ce conciliabule il semble qu'il ait de plus pres approché de Christ que c'est esprit ie ne sçay quel qui a nagueres gouuerné vostre Concile.

I. Mais toy regardé vne fois deux fois ce que tu dis, car par toutes mes Bulles i'ay



maudit tous ceux qui ont porté faueur & ayde a ce conciliabule.

P. Miserable comme encores il ressent cet ancien Iules. Mais à là fin quelle issuë a eu cest affaire?

I. Iel'ay laissée en cet estat : l'euenement monstrera que la chose deuendra.

P. Mais qu'oy que ce soit le schisme & diuision demeure.

I. Il demeure voirement & trop d'ange-reux.

P. Et toy vicaire & lieutenant de Christ as mieux aymé la diuision qu'un vray Concile.

I. J'ayme mieux trois cent schismes, que d'estre reduit au petit pied, & à rendre compte de toute ma vie.

P. Est-tu si peu asseuré en ta conscience?

I. A quoy te sert cela.

P. Je t'entends il n'estoit pas expedient d'emouuoir ceste ordure, mais qui est-ce qui emportera la victoire?

I. Cela depend de l'euenement, combien que de nostre part nous ayons plus de finances : Le François est espuisé par la longueur de la guerre, l'Anglois à des montaignes d'or ausquelles on n'a point encor touché : & peux sans doubte deuiner cela, que si le François est victorieux ce que j'ay à contre-



cœur, le nom des choses dont est question sera renuersé, le sacrosainct concile sera le conciliabule de Sathan, & moy iene seray Pape, mais l'idole du Pape, le S. Esprit sera sur eux, & tout ce que nous auons fait sera par l'Esprit de Satan. Mais i'ay vne grande assurance en l'argent que i'ay laissé que ces choses ne se feront pas.

P. Mais qu'avez vous à redire contre les François & leur Roy? lequel vos predecesseurs ont honoré du nom de tres-chrestien, principalement veu que vous confessez que par leur ayde vous avez vescu & esté esleué en ceste couronne plus que imperialle? D'auantage que vous avez recourré Boulougne & les autres villes, & que vous avez surmonté les Venitiens inuincibles à tous, comment est-ce que la memoire de tant de nouveaux bien-faits à esté abolie? commēt est-ce que l'on à rompu tant d'alliances.

I. Ce ne seroit de long temps fait de raconter tout ce discours? affin de le dire en bref, rien n'a esté fait de nouveau par moy, mais alors i'ay commencé à mettre en euidence ce que des long temps i'auois proiecté en mon esprit, ce que i'auois disimulé au parauant, mes affaires le requerant ainsi, alors ie l'ay descouvert. iamais ie n'ay eu aucune bonne affectiō encores les François, & crois

que cest l'oracle mesmes qui le dit , & n'y a pas vn Italien qui ayme les Barbares , non plus par Hercule que les loups ayment les agneaux , mais moy qui suis non seulement Italien mais aussi de gennes , me seruois de leur amitié, ce pendant qu'il en estoit de besoin, car iusques la il faut vser de leur amitié. Cependant i'ay beaucoup enduré, i'ay controuué beaucoup de choses, en fin i'ay beaucoup fait & supporté, mais apres que les choses sont arriuees au point que ie voulois, il restoit que ie iouasse mon personnage, & que ie chassasse toute ceste vermine de Barbares hors de l'Italie.

P. De qu'elle façon sont ces bestes que tu appelles Babares.

I. . Ce sont des hommes.

P. Ce sont donc hommes, mais non pas Chrestiens?

I. Et sont Chrestiens, mais dequoy sett cela à l'affaire dont est question.

P. Donc ils sont Chrestiens, mais sans loix & sans lettres menans vne vie rustique:

I. Mais plustost ils sont fort aduancez en ces choses, & d'auantage en richesses, ehose enquoy nous leur portons principalement grande enuie.

P. Que veut donc dire ce nom de Barbare, que groumeles tu entre tes dents.

G. Je te le diray, au lieu de luy combien les Italiens soient ramassés & meslez de la racaille de toutes les nations les plus Barbares, non autrement que quelque sentine toutes-fois ils ont esté imbutz de ceste folie par les liures des gentils qui appellent Barbares tous ceux qui sont natifs hors de l'Italie, lequel surnom entre eux est plus iniurieux, que si on appelloit quelqu'un parricide ou sacrilege.

P. Il me semble ainsi, mais puisque Christ est mort pour tous hommes, & qu'il n'a point d'esgard aux personnes, & que tu te dis vicaire de Christ pourquoy n'embrasseras tu les uns & les autres d'un mesme courage, puis que Christ ne les a point delaissez?

P. Certes ie desirerois embrasser les indiës Africains, ethiopiens & Grecz, pourueu qu'ils m'apportent, & me recognoissent pour prince, affin de me payer des tributs, Mais a bon droit nous les auons separez d'avec nous comme n'y a pas long temps les Grecz, par ce que estâs gens trop pres tenans, ils ne reconnoissent guere la Majesté du Pape de Rome.

P. Donc le siege de Rome est comme le grenier de tout le monde?

I. Te sèble il que ce soit chose grande si nous moissonnons en toutes les choses charnelles

veu que a tous nous femons nos choses spirituelles?

P. Quelles choses appelle tu spirituelles car iusques a present ie n'ay rien entendu de toy que choses mondaines, parauanture tu attires les hommes a Christ par la doctrine sacree?

I. Il y en a qui preschent s'ils veulent, & nous ne les empeschons pas, pourueu qu'ils ne mettent rien en auant contre nostre Majesté.

P. Quoy donc?

I. Quoy donc. Pourquoy est-ce que l'on donne aux Roys tout ce qu'ils demandent, si ce n'est pour ce qu'ils sont d'accord auoir receu d'eux tout ce qu'ils possèdent, combien qu'ils n'ayent rien receu d'eux: Ainsi il nous fait attribuer tout ce qui est quelque part que ce soit de sacré, encor que toute nostre vie nous ne facions que dormir. Cōbien que outre ce nous octroyons abondamment des indulgences pour vn petit d'argent, & dispenses en choses de consequence pour non trop grandes sommes, & donnons la benediction par tout, & ce pour rien.

P. Certes ie n'entēds rien a tout cela. Mais reuenons a ce dont nous parliōs, pourquoy est-ce que la tressainte Majesté a en si grande horreus



de horreur les Barbares, que tu ayes esté d'aduis qu'il falloit mesler le Ciel & la terre, affin qu'ils peussent estre dechassez d'Italie?

I. Ie te le diray, tous les Barbares sont volontiers superstitieux, & principalement les François: car nous accordons assez bien avec les Espagnols, soit que tu ayes esgard à la langue ou aux meurs, combien que ie desirerois aussi qu'ils fussent recullez affin que ie peusse tout manier selon mon plaisir.

P. Adorent ils d'autres dieux que Christ?

I. Au contraire ils ont en reuerence le mesme Christ par trop soigneusement: & est chose esmerueillable de ce que ces gens tres fols sont esmeus de ie ne scay quels mots anciens qu'il y a long temps qui ne sōt plus en vſage.

P. Parauenture sont ce termes magiques

I. Tu te mocques, mais plustost des noms de simonie blasphemie, sodomie, benefice, forcelerie.

P. C'est bien parlé.

P. Comme toy mesme les abomine aussi font ils.

P. Ie laisse la les noms, mais la chose se trouue entre vous, affin que ie ne die quelle n'est point entre autres Chrestiens.

Certes les Barbares ne sont point exempts de vices , mais en estans entachez d'autres , ils ont en horreur les nostres , & au regard des leur ils se flatent. Nous au contraire nous plaifons aux nostres , & auons en horreur les leur. Nous estimons que c'est vn reproche abominable que pauureté & que l'on doit fuir par tous moyens, eux estiment à grād peine estre chose Chrestienne de iouyr des richesses voire mesmes acquises sans fraude. Nous n'osons seulemēt nommer l'yurongnerie ; ( combien que a ce regard nous ne soyons pas du tout cōtraires si nous nous accordions en toute autre chose : mais les Allemans estiment que c'est vne faute legere, & recreatiue plus que meschante. Ils ont en exeration l'vsure, Mais entre nous il n'ya aucune espece d'omme, qui soit plus necessaire à l'Eglise. Ils estiment la sodomie estre orde & sale , de telle façon que si on la nomme seulement ils pensent que le soleil & l'air en soient infectez , nous sommes bien loin de c'est aduis. Itē ils craignent comme vn ombre le mot de simonie qui des long-temps n'est en la nature des choses en vsage, & retiennent fermemēt les loix des anciens qui sont abrogees. Nous auons esgard à autre chose , & y a beaucoup d'autres chose esquelles estās dilsēblables en

maniere de viure, il les faut reculer bien loin de nos façons de faire: parce qu'ils nous auront en plus grande recommandation s'ils ne les cognoissēt, pas car si vne fois ils cognoissent les secrets de nostre cœur ils les publient incontinent, & ne scay comment ils sont merueilleusement clairs voyans a reprendre les vices, ils rescriuēt a ceux de leur parti des lettres tresmesdisantes, ils crient par tout que le siege de Christ n'est pas de nostre côté, mais vne cloaque de satan, ils mettent en dispute si viuant ainsi i'ay peu paruenir au pontificat, si ie doibs estre tenu pour Pape, & ainsi en premier lieu auoiēt diminué l'opinion de nostre Saincteté & auctorité entre gens incognus, & qui n'auoient auparauāt rien entendu de nous sinon que nous estiōs vicaires de Christ, & auions la prochaine voire pareille puissance que luy. Par ce moyē il vient vne perte insupportable à l'Eglise Chrestienne, car nous vendons beaucoup moins de dispenses & a moindre prix; on reçoit moins de reuenue des Eueschez & Abayes, si l'on fait quelque demande, le peuple le baille a plus grand regret, de quelque part que ce soit, le gain est beaucoup moindre, & les marchandises de moindre prix: finalement ils n'ont pas si grande frayeur de nos foudres, que s'ils sont si har-



dis de dire que le Pape est meschant, qu'il ne faict rien, & qu'ils mesprisent nos foudres, nous en viendrôs la qu'il nous faudra mourir de faim, que s'ils sont eslongnez (tel est l'esprit des Barbares) ils nous reuereront d'auantage, & par nos lettres escrites à nostre loisir, nous ferons mieux nos affaires, selon que nous le desirons.

P. Les affaires ne se portent pas bien si l'autorité Apostolique depend de la, que l'on ne cognoisse la vie & les tromperies: Nous ne desirions autre chose sinon que tout le monde cognust tout ce que nous faisiôs, iusques à nos chambres mesmes, & a lors on faisoit grand estat de nous, si l'on auoit au vray cognoissance de nous. Mais dy moy y a il au monde des Princes si religieux & s'ils portent tant d'honneur aux prestres, qu'a l'appetit d'une persône & encor tel ils prennent tous les armes en main: car en mon tēps les Princes nous estoient fort contraires?

I. En tant que touche la vie des Chrestiens ils ne sont point si superstitieux, ils nous mesprisent, & tiennent pour gens de neant, si ce n'est qu'il y en a entre eux de plus infirmes qui craignent ce terrible foudre d'excommunication, & ceux la mesmes ne sont point tant esmeuz au vray que par opinion. Il y en a qui esperent ou craignent



noz richesses , & pour ceste occasion ont quelque respect à nostre auctorité. Il y en a qui ont ceste opinion , qu'il aduiendra quelque grand mal a ceux qui font mal aux Prestres , & tous Presques comme ils sont ciuilement instruits deferent quelque chose aux ceremonies principalement en estans par nous admonestez , car l'on repaist cōmune-ment le peuple de Ceremonies , comme de fables: cependant l'affaire se fait a bon esciēt. Nous leur donnons des tiltres magnifiques, combien qu'ils soient tres mechans, appelās l'un Catholique, l'autre serenissime, l'autre l'Illustrissime vn autre Auguste, mais les nō-mons tous nos biē ayez enfans, & quant a eux ils nous appellēt tres-S. Peres, lors qu'ils nous escriuent , & quelques-fois ils s'abaissent iusques a baiser nos pieds. Et ou il n'y a pas grande d'ifficulté, ils deferent quelque chose a nostre authorité, affin que le peuple les estime deuotieux. Nous leur enuions des roses consacreez, des couronnes, des espees, & confirmons leur dignité par de grandes Bulles , & quand à eux il nous enuoyent des cheuaux, des gens de guerre, de la finance , quelques fois des ieunes enfans, & par ce moyen comme l'on dit en commun prouerbe, les mulets s'entre grattent.

P, S'ils sont tels, ie ne sçay par quel moy-

en tu as peu esmouuoir de si grands Roys à des guerres de si grande consequence, principalement ayant rompu de si grands accords.

I. Mais si tu peux maintenant comprendre ce que ie te diray, tu cognoistras vn esprit plus que Apostolic.

P. Pour certain i'y tascheray autant qu'il me sera possible.

I. I'ay eu principalement soin de cognoistre les esprits, mœurs, disposition, richesses, & entreprises de toutes natiōs, principalement des Princes, avec qui ils sont amis, ou ennemis. Et en apres vfer de ces choses selon nostre commodité.

P. Premièrement i'ay facilement esmeu les François contre les Venitiens, pour ce qu'il y auoit entre eux vne vieille & ancienne inimitié. D'auantage nous sçauions que ceste nation desiroit fort destendre son Empire, & les Venitiēs leur auoit osté quelques villes : par ainsi ie meslois mon affaire avec la leur, lors l'Empereur combien qu'il ne fust gueres amy du François toutes-fois pource qu'il n'y auoit autre esperance de retirer ce qu'ils luy retenoient (car ils retenoient quelques belles villes) selon la commodité du temps, se ioignit avec les François, mais ne trouuant pas bon que les François s'aduançassent tant (car l'affaire auoit

succedé plus heureusement que ie ne d esi  
 rois ) premierement i'incité contre eux le  
 Roy d'espagne, homme de fidelité non gue-  
 res asseurée mais qui auoit interest quē la  
 puissance des François ne s'estendist si auant  
 pour plusieurs raisons, & principalement de  
 peur que le Royaume de Naples ne luy fust  
 osté outre ce, encores que ie n'approuasse  
 les venitiens, toute-fois par faintisse ie les re-  
 ceus en grace, affin que ie les animasse con-  
 tre les François, cōtre lesquels ils estoient irri-  
 tez a cause de la nouuelle perte qu'ils auoiēt  
 faite derechef ie desuni & separe d'avec les  
 François l'Empereur lequel i'auois vnypeu au  
 parauant avec eux, partie par lettres, partie  
 par argent; qui tousiours peut beaucoup en-  
 uers vn hōme indigent, & en partie par mes-  
 sages en renouvelant la haine ancienne qu'il  
 auoit contre les François, encores qu'il n'eust  
 pas la puissance de son pouuoir vāger, ie sca-  
 uois que Anglois auoient vne grande inimi-  
 tié cōtre les François, & les Escossois leurs al-  
 liez outre ce ie cognoissois que cestoit vne na-  
 tion fort courageuse, & qui desiroit la guerre;  
 & principalement pour l'esperance de pou-  
 uoir piller & encores aucunemēt superstitieu-  
 se, pource quelle est loin de rome, finallemēt  
 insolens & s'esmouuans a cause de la nouuel-  
 le liberté qui leur estoit aduenue par la mort



du Roy le plus feuerre que l'õ eust sceu voir, de telle façon qu'il pouuoit estre facilement esmeu à entreprendre quelque folie, ce que principallemēt ie desirois : mes affaires mesmes prirent vn meilleur train par le moyen de leur Roy fort iouuenceau & plustost enfant de nouueau venu au Royaume, d'vn esprit vehement & vigoureux, & qui sentoit sa ieunesse, c'est à dire sans repos, & belliqueux & qui n'estoit pas seulement ambitieux par l'aage, mais disposé à choses hautes, duquel l'on disoit que des son enfance son principal soin estoit de faire la guerre aux François, outre ce il auoit contracté affinité avec le Roy d'Espagne, lequel i'auois attiré à la guerre, rusé de toutes ces choses au proffit & vtilité de l'Eglise, & par le moyen de six cēs paires de lettres missiues escrites nō sans vn mien artifice i'enueloppé tous les Princes en vne guerre tres facheuses & n'ay laissé par vn des autres mesme les Rois Hongrie & Portugal, & le duc de Bourgogne égal au Roys, que ie n'aie fait ce qu'il ma esté possible pour les induire a prendre le mesme parti : mais parceque cela ne les touchoit en rien, ie ne leur ay peu persuader, mais i'estois asseuré que ceux la estant en trouble, pas vn des autres ne seroit à repos. Ceux cy donc faisans ce qu'ils auoiēt proiecté, toutes-fois

roient

receuoient de nous vn tiltre fort honorable: c'est à ſçauoir queld'autât qu'ils apporteroient plus de dommage au peuple Chreſtien dautant plus ils ſembleroyent religieusement defendre l'Egliſe de Dieu, & afin que tu ayes en plus grande admiratiō mon eſprit ou mon bon heur, en ce temps là le Roy d'Eſpagne faiſoit la guerre contre les turcs, avec vn grand gain & aduancement, toutes fois delaissant le tout il tourna ſes forces entierement contre la France: outre ce l'Empereur eſtant obligé aux François non ſeulement par pluſieurs accords mais auſſi bien faiçts, quād ce ne ſeroit qu'il auoit recouuré en Italie les villes quiluy appartenoient, a leurs propres couſts & d'eſpēs, & qu'il auoit aſſes de quoy s'employer, a ſcauoir a garder ce qu'il poſſedoit encores, (car Padouē s'eſtoit dela renoltee) & en Bourgongne, pour faire que les Gueldres ſes tres grand ennemis (de faire la guerre auſquels il auoit eſté) autheur ſe deſioigniſſent d'avec ſon nepueū le Prince de Bourgongne & par ainſi i'ay tant faiçt que laiſſant ſes propres affaires, il a faiçt les miennes: & quand aux Anglois, il n'y a nation en laquelle l'autorité du Pape ſoit moins reſpectee, dont li apparoitra incontinent ſi quelqu'vn lit la vie de ſainct Thomas de Cantorbery & ſes ordonnances, mais toutes-fois ceſte nation

encor qu'elle soit tres-impaciente d'endurer des subides & exactions, cependant peu s'est fallu qu'elle ne se soit laissée engloutir, Mais c'est merueille que les prestres mesmes qui ont accoustumé de no<sup>r</sup> derober ce qu'ils peuuent, cependant ont enduré que l'on fist des leuees sur eux, ne prenans pas garde qu'elle licence ils ont permise aux Rois à l'auenir. Combien que les Roys mesmes n'ont pas apperceu que ceste façon de faire leur estoit preiudiciable, assauoir qu'il estoit loisible au Pape de dechasser de son Royaume le Prince qu'il hayra, & ce ieune Roy a donné commencement à l'affaire avec plus grand trouble que ie ne desirois, & que ie ne luy auois cōmadé, combien que i'aymois mieux qu'il faillist de ce costé là: or ce seroit chose trop longue de racompter par le menu par quels artifices i'ay esmeu les Princes à vne guerre si dangereuse contre des Chrsitiens, veu que pas vn Pape ne les a peu faire esleuer contre des Turcs.

P. Mais il pourra aduenir que le feu de la guerre pat tout esmeuë s'espandra par tout le monde.

I. Il ne m'enchant qu'il s'espande pourueu que le siege Romain conferue sa dignité & ses possessions, combien que ie tasche à réster le fort de la guerre de l'Italie aux nations Barbares, qu'elles combattent tant qu'elles



voudront , de nostre part nous les regarderons faire , & parauanture iouyrans du fruit de leur folies.

P. Donques ces choses n'appartiennent elles pas à vn pere tres-saint & vicaire de Christ.

I. Pourquoy sont ils auteurs d'vne diuisió.

P. Mais il faut quelques fois supporter les pechez s'il y a plus de mal au remede, dauantage si tu eusses receu le concile il n'y eust point eu de diuision.

I. C'est bien dict i'aymerois mieux six cés guerres qu'vn Concile, quoy s'ils m'eussent dechassé de la Papauté comme simoniaque & traffiquant du Pontificat, & non Pontife? & quoy s'ils eussent descouuert au peuple toute ma vie.

P. Combien que tu feusses vray Pontife, ce neantmoins il estoit meilleur de quitter l'honneur que deffendre ta dignité par tant de guerres & maux-esmeus cõtre des Chrestiens, quand ainsi feroit qu'vn Euesché donné à vn indigne ou qui auroit esté achepté ou pris par force fust vne dignité, de la vient qu'en passant il m'est venu en l'entendement, que tu as esté par quelque diuin conseil comme peste aux François, qui t'auoient cõme vne peste au parauant-elleué en l'Eglise.

I. Ieiure par ma triple couronne, & par mes magnifique trióphes, si tu continues à

m'esmouuoir, que tu fétiras la forcede Iules.  
 P. O l'homme Phrenetique, & hors du  
 sens, mais iusques à present ie n'entends rien  
 sinon qu'un Cappitaine non ecclesiastique,  
 mais mondain, à eu beaucoup de puissance  
 pour rompre les accords, pour enflammer  
 des guerres, pour esmouuoir à des meurtres,  
 cela n'est pas vne puissance du Pape, mais de  
 Satan. Il faut que celuy la qui se porte pour  
 Vicaire de Christ se cõporte au plus pres à sõ  
 exemple, il y à en luy vne souuerainne puis-  
 sance, mais cõiointe avec vne souueraine bõ-  
 té & vne souueraine sagesse, mais tresimple  
 ie voy è toy vn image d'une souuerainne puis-  
 sance cõiointe avec vne suprefme malice &  
 folie, que si le diable Prince des mal'heurs  
 vouloit mettre è sa place vn vicaire, qui choi-  
 siroit il plustost qu'un qui te ressembleroit,  
 dis moy ou est -ce que tu t'es monstre Apo-  
 stolique.

I. Qui à il plus Apostolique que d'accroi-  
 stre l'Eglise de Christ.

P. Mais si l'Eglise est le peuple Chrestien  
 vny par l'esprit de Christ, tu me ressembles  
 auoir renuersé l'Eglise, veu que tu as esmeu  
 tout le monde à des mal'heureuses guerres,  
 afin que sans estre subiect à aucune peine tu  
 fusses meschant.

I. Mais nous appellõs l'Eglise les tẽples, les  
 Prestres, & principallemẽt la cour de Rome

me, & moy principalement qui suis le chef de l'Eglise.

P. Mais Christ nous fait ministres, & luy en est le chef si ce n'est d'avanture qu'il en ait subrogé vn second, comme estant maintenant l'Eglise tant accreuë.

I. Tu viens maintenant au point, partant ie te diray que ceste Eglise qui estoit anciennement affamee & pauvre, est maintenant tres florissante en tous ornements.

P. Quels? est-ce d'une vehemence de foy?

I. Tu te mocques de rechef.

P. Est-ce par sainte doctrine?

I. Tu me romps la teste.

P. Est-ce par le mespris du monde.

I. Laisse moy parler, ie te dis de vray ornements; car ce que tu me mets en avant ne sont que parolles.

P. Quels sont ils donc.

I. De beaux palais Royaux de tres beaux cheuaux, tres belles mules, de grand nombre de seruiteurs, de gens de guerre, bien armez, de gardes bien en ordre.

G. De tres-belles putains, de maquereaux fort seruiables & obeissans.

I. D'or de pourpre, & de subsides & impôts de façon qu'il n'y a Roy qui ne semble de basse cōdition & pauvre si on l'accōpare aux richesses & au bruiet que fait le grand nombre de ceux de la suite du Pape, il n'y a per-



sonne si a son aise & iouïssât de tās de biēs qui ne condamne sa fragilité, personne n'a tant de finances feust-ce vn vsurier, qui ne porte enuie à nos moyens, ce sont les ornements que i'ay deffendus & accreus.

P. Mais d'y-moy qui est celuy qui le premier a souillé & chargé de ces ornements l'Eglise que Christ a voulu estre trespure & sans macule & empeschement?

I. A quoy sert cela, certainemēt nous possédons & iouïssons de ce qui est le principal combien que l'on dit que Constantin Empereur a anciennement transporté toute la Maïesté de l'Empire à Syluestre Pape de Rome, ornements, cheuaux, chariots, le heaume, le baudrier, la cotte d'armes, la garde, les villes, les Royaumes.

P. Mais appert il de certains enseignemens de ceste l'argesse & liberalité

I. Non excepté vne paille meslee parmy les decrets.

P' C'est paraenture vne pure fable

I. Ie le coniecture de moy mesmes, car qui est-ce estant de sain iugement qui voudroit cedder, voire a son pere, vn Empire si magnifique, mais neantmoins il me plaist fort de le croire & nous imposons silence avec grandes menasses a ceux qui taschent de refuter ceste opinion.

P. Mais ie n'entens encor rien sinon du

monde.

I. Tu songes encores a ceste antienne Eglise en laquelle toy avec quelque autres Euesques affamez n'estois qu'un Euesque, plus froid que latre, subiect a pauureté, sueurs & perils & a mil autres incommodités, maintenant l'Eglise a changé le tout en mieux: c'est autre chose maintenant qu'un Pape de Rome que seroit-ce si tu voyois maintenant tant d'Eglises basties de richesses Royales, tant de milliers de presens, quelques vns fort riches, & opulés, esgaulx aux grâds roys, de si tres beaux palais de Prestres, & principalement si vous voies maintenant a Rome tant de Cardinaux abillés de pourpre, ayans des legions de seruiteurs pour leur garde, tant de cheuaux plusq royaux, tât de mulets reparez de fin lin, d'or & de pierres pretieuses, mêmes quelques vns ferrés d'or & d'argent: que si tu voyois le Pape maintenant estre porté sur vne selle d'or sur les espaules des gens de guerre, a un branslemēt de main estre adoré de tous, le grand bruit des artileries l'aplaudissement & acclamations du peuple, si tout esclaire par force flambeaux: & les grands Princes a grand peine receus a baiser leur pieds, biēheureux si tu eusses veu ce prestre Romain mettant du pied la Couronne sur la teste del'Empereur qui est le Roy des Roys ( s'il faut croire a ce qui est

Esript, combien qu'il n'ait rien sinon l'ombre d'un grand & renommé nom, si tu auois d'i-je veu & ouy ces choses que pourrois tu dire?

P. Que ie voy vn tyran vrayment plus que du monde, ennemy de Christ, la peste de l'Eglise,

I. Tu parleroies autrement si tu auois veu vn tout seul de mes triomphes, ou bien celui de quand ie fis mon entrée à Boulougne ou a Rome, lors que ie remporté la victoire des venitiens: ou le dernier apres que les François contre toute esperance ont esté deffaiets a Rauenne; si tu auois veu les petits & grands cheuaux, si l'armée des gens de guerre, si les ornemens des Capitaines, si les spectacles & ieux d'enfans choisis, si les flambeaux reluisans d'une part & d'autre, si l'appareil des viandes si la magnificence des Euesque, si l'orgueil des Cardinaux, si les trophées, si les despouilles gangnees sur les ennemis, si les acclamations du peuple & gens de guerre qui montoient iusques au Ciel, si de tous costés le bruit & claquement de mains, si le chant des clairons, si les esclats des trompettes, la foudre des artilleries, si l'argent espandu entre le peuple, si tu m'eusse veu comme chose diuine porté en haut estant le chef & auteur de cet apareil, tu eusses dit que les scipions, Auguste & Emilius estoient sordides & ce



& ce contentant de peu au pris de moy.

P. Hola, gendarme outrecuidé c'est assez conté de tes triomphes, lesquels bien qu'ils soient Ethniques neantmoins i'embrasse en haine de toy, qui te faisois conduire en triomphes, apres que pour toy tant de milliers de Chrestiens ont esté tuez mesmes que toy qui te dis pere tres-saint en Christ as esté cause de la mort de tant de legions de gens de guerre, & qui n'as amené a la cognoissance de Christ pas vne personne soit par parolles, ou sainteté de vie ! ô les entrailles paternelles ! ô le digne vicaire de Christ qui fut mis en croix afin qu'il sauuaist les autres & toy, afin de defendre vn chef pestilentieux, as attiré la ruine de tant de monde.

I. Tu dis ces choses parce que tu portes enuie à ma gloire quand tu consideres combien ta dignité Episcopalle à eu peu de puissance, si l'on la confere avec la mienne.

P. Impudent que tu es ose tu bien accompagner ta gloire à la mienne, combien que ma gloire est la gloire de Christ, & non pas mienne, en premier lieu si tu me cōfesses que Christ est le vray prince de l'Eglise, il ma baillé les clefs de son Royaume, il m'a donné charge de paistre ses brebis, il à approuué ma foy par la louange qu'il a faict d'icelle. Et quant à toy tu as esté faict pape par argent, & par les affections des

hommes, & par trôperies si lon doit appeller Pape celuy qui est paruenü par tels moyens. Donc i'ay gagné a Christ tant de milliers d'ames, & toy les a attirés a ruiné. I'ay le Premier enseigné Christ a Rome au parauant Ethnique: & toy as esté autheur de confondre la doctrine Chrestienne avec l'Ethnique, ie garisois les malades voire de l'ombre de mon corps, ie deliurois du diable ceux qui en estoient tourmentez: ie ressusitois les morts; & remplissois tuot de biē-faiçts quelque part que ie m'acheminasse qu'ont eu tes triomphes de semblable: ie pouuois liurer a satan de parolle ceux que ie voulois: & Saphira avec son mary ont experimenté ma puissance, outre cei i'ëployois tout ce que i'auois de puissance au profit de tout le monde: & toy estant inutile a tous, as employé ce que tu pouuois, voire mesmes ce que tu ne pouuois pas, à la ruyne publique du monde.

I. Ie m'esmerueille comment en la dispositiō de tes vertus tu n'adioustes aussi la pāuureté, les veilles, les sueurs, les sieges iudiciaux, les prisons, les liens, outrages, les playes, en fin la croix mesmes.

P. Tu fais bien de m'en admonester: car a meilleur droit ie me peux glorifier de cela, que des miracles. Car par ces choses Christ nous a commandé de nous eiouyr, & nous glori-

fier, & par le moyen de cela mesmes il nous a appelez bien - heureux. Ainsi Paul qui a esté autres fois mon compagnon d'administration, quand il racompte ce qu'il a fait de bien, ne fait point mention de villes acquises & gagnées par armes, ou legions defaites, n'y de Princes qu'il ayt esmeu a la guerre, non vn orgueil tyrannique, Mais des n'aufrages, des liens d'auoir enduré le foit, & embusches, voila le vray & Apostolic triôphe, voila la gloire d'un vray conducteur & païteur chrestien. Il se vante de ceux qu'il a engendrez en Christ, ceux qu'il a retirez de leur meschanceté, non pas combien il a amassé de milliers de ducats, finalement nous qui perpetuellement triomphons avec Christ, sommes mesmes loüez des meschans. Mais il n'y a personne qui ne t'ait mesmes en execration, s'il n'est du tout semblable à toy, où bien vn flatteur.

I. L'entens vne chose que ie n'ay encores cy deuant entenduë.

P. Je t'en croy, car comment eust-il esté possible que tu eusse l'eu les saintes Escriptions, & mes epistres, & celles de Paul, estant empesché de tant d'ambassades, tant d'alliances tant de Comptes, de tant d'armes, & certes les autres arts requierent vn esprit vide de soyn vil & abiect: Mais la discipline de Christ demande vn cœur fort repurgé de toute contagion,



& sollicitude terrienne. Car vn si grand maistre n'est pas descendu du Ciel en terre, pour donner aux hommes vne facile & vulgaire philosophie : estre Chrestien n'est pas vne professiõ de ne rien faire, où estre nonchalent. Ne tenir compte de toutes les voluptez, non plus que de poison, fouler aux pieds les richesses comme la bouë, ne tenir compte de sa vie, c'est proprement la profession d'un homme Chrestien, qui semble à ceux qui ne sont pas conduits du saint Esprit ne pouuoir estre supportée, & au lieu de ce se laissent aller à des mots, esquels il n'y a que des ceremonies & pure vanité, & au chef de Christ qu'ils ont forgé de leur main ils adioustēt vn corps qu'ils ont ainsi forgé.

I. Mais dy moy que me delaissest tu de bien, si tu m'ostes mes facultés, & moyens? si tu me despouilles de mon Royaume, & de mon honneur, si tu me priues de mes plaisirs, mesmes de la vie?

P. Mais ie te prie que ne dis tu donc Christ mal-heureux, lequel encores qu'il fust le plus grand de tous, a esté sujet à la mocquerie de tous & a passé toute sa vie en pauureté sueurs, ieusnes, soif, & faim, & est en fin mort d'une mort ignominieuse?

I. Certes il trouuera possible en ce temps quelques vns qui le loueront, mais personne

quil l'ensuyue.

Mais le louer est proprement l'imiter, combien que Christ ne priue pas les siens de biens, mais pour de faux biens il les enrichist de biens vrayz & eternels, & ne les enrichist pas, si premieremēt ils n'ont reōncé a tous les biens de ce monde, & comme il estoit du tout celeste, ainsi il a voulu que son corps, c'est à dire son Eglise luy ressemblassent du tout, c'est à dire qu'il fust esloigné de toute ordure de ce monde, autrement comment pourroit il estre vn avec celuy qui est es cieux si est encor plongé aux ordures de ce monde. Mais apres qu'il aura esté d'eschargé de toutes les commodités de ce mode: & d'auantage ce qui est plus malaisé d'affections, alors Christ desploye ses richesses & pour les plaisirs qu'ils ont laissés qui en apparence sont doux, mais au vray ont vne grande amertume, il donne des ioyes celestes.

I. De qu'elles richesses me parlez tu ie te prie.

P. Estimes tu que ce soient richesses communes, que les dons de prophetie, de science, de miracle, si tu n'estimes mesmes Christ estre vil, & abiect, quand nous possedons lequel, toutes choses nous sont adioustees, finalement si tu ne penses que nous menons icy vne vie necessiteuse, ie te peux asseurer qu'autant que quelqu'un est plus affligé en ce monde, plus il vit en d'elices avec Christ, plus il est pauvre au

monde, plus il est riche en Christ, plus il est vil & abieſt au mōde, plus il est eſleuē & honorable en Christ: moins il vit en ce monde, Plus il vit en Christ. Mais il luy a pleu que tout ſon corps fuſt treſné, & principalement ſes miniſtres, c'eſt à dire les Eueſques, & entre eux celui qui eſt en plus grande autorité, doit plus reſembler à Christ, & plus deſchargé & moins empeſché de toutes commoditez de ce monde. Maintenant ie voy le contraire que celui qui ſe vante d'eſtre le plus proche de Christ, meſmes qui veut eſtre eſtimé luy eſtre pareil, eſtre plongé en toutes choſes ordes & ſalles; à ſçauoir en argent, ſeigneuries, armées, guerres, accords, afin que ie ne mette en auant ſes vices: & encores tu abuſes du nom de Christ pour donner lieu & couleur à ton orgueil: cōbien que tu ſois tres-eſlongné d'iceluy, & ſous l'ōbre de celui qui à meſpriſé le regne du mōde, tu te portes en tyran du monde, & eſtant le vray ennemy de Christ, tu t'atribues neantmoins l'honneur qui eſt deu à Christ, toy qui es maudit donne la benediction aux autres: tu ouure le Ciel aux autres où tu n'as aucunemēt d'entrée, tu conſacres eſtant maudit & execrable: tu excōmunies, toy qui n'as rien de commun avec les ſaincts. Car qui à il difference entre toy & l'Empereur des Turcs, ſinon que tu tecouures du nom de Christ: mais l'inten-



tion est semblable, l'ordure & vilenie de la vie semblable, mais tu es la plus grande peste du monde.

I. Mais mon souhait estoit, que l'Eglise fust parée & enrichie de tous biens, on dit que Aristote met de trois sortes de biens, desquels les uns sont de fortune, les autres du corps, & les troisiemes de l'esprit, partant ie ne voulois pas mettre les uns deuant les autres, i'ay commencé par les biens de fortune, & par auanture fusse paruenü aux biens de l'esprit, si ie ne fusse mort auant le temps.

P. Vrayement c'est vne mort aduenüe auant le temps, à toy qui as soixante & dix ans, mais qu'estoit-il de besoin de mesler de leau avec le feu.

I. Mais si ces commodites nous defaillent, le menu peuple ne nous aura en aucune estime, & maintenant ils nous craignent & adorent, & toute la republique Chrestienne tomberoit du tout en ruine, si elle ne se pouuoit deffendre contre l'inuasion de ses ennemis.

P. Mais plustost si le peuple Chrestien voyoit en toy les vrais ornemens de Christ, à sçauoir la sainteté de vie, la sacrée doctrine, vne charité enflambée, la prophetie & les vertus, il t'auroit en plus grande recômandation, quand il cognoistroit que tu seras plus pur & net de routes cōmoditez du mōde: Et la Repu. Chre-

stienne floriroit bien d'auantage, si elle estoit admirable aux Gentils, par le mespris des voluptez, richesses, Empires, & de la mort. Mais maintenant elle est reduitte non seulement au petit pied, mais aussi si tu epluches la chose plus diligemmēt tu trouuerras plusieurs personnes qui ne sont Chrestiens que de nom seulement. Je te prie quand tu estois le souuerain Pasteur, ne considerois tu pas par quels moyens l'Eglise auoit eu son cōmēcemēt par quels elle estoit accrue & par quels elle auoit esté affermie, estoit ce par guerres & richesses royales, ou par cheuaux, & non plustost par patience, par le sang des Martyrs & le nostre, par prisons, & estre foüettez? Tu dis que l'Eglise est accrue quand ses ministres sont chargez de seigneuries mondaines, qu'elle est bien ornée & parée, quand elle est soüillie & embellie des dons & delices du monde, tu l'appelles estre deffendue quand tout le monde esmeut des guerres pernicieuses pour le bien & reuenu des prestres. Tu dis qu'elle florist quand elle est eniuree, par les plaisirs du monde: paisible quand personne ny contredisant elle iouïst des richesses, voire plustost des vices, & par ces tiltres colorez tu as fait accroire ce que tu as voulu aux Prince que selon que tu les as enseignez appellāt leurs grands larcins & cōbats la deffence de Christ.

I. Mais ie n'ay iamais entendu ces choses.

P. Qu'est-ce

P. Quest-ce d'oc que t'enseignoient les prescheurs?

I. Je n'oyois autres choses d'eux que de pures loüanges, par ornemens de parolles, ils exaltoient mes merites: que i'estois Iuppiter, esbranlois & faisois tout trembler, & preschoient que i'estois quelque diuinité, le salut du mōde & plusieurs autres choses semblable.

P. Et cettēs ce n'est point de merueilles s'il ny auoit personne qui t'assaisonnast veu que tu estois du sel insidipe, & sans saueur: car c'est la propre charge d'un homme Apostolic d'enseigner Christ tres-purement.

I. Ne m'ouuiras tu donc point?

P. T'ouurirois plustost à tout autre qu'à vne telle peste, car tu nous tiens tous pour excōmuniēz. Mais veux tu que ie te donne vn conseil qui n'est point mauuais, tu as vne bande d'hommes courageux, tu as grande quantité d'argent tu es vn bon bastisseur, edifies toy quelque nouueau paradis, pourueu qu'il soit bien fortifié, de peur qu'il ne soit forcé par le diable.

I. Mais plustost ie feray ce qui est plus digne de moy, i'attendray icy quelques mois, & ayant accru mes forces ie vous dechasseray hors d'icy si vous ne vous rendez a moy, car ie ne doute point que de brief il ne vienne a moy soixante mil hommes, du meurtre qui



prouiendra de la guerre.

P. O la peste : ô la miserable Eglise ? Mais ô toy Genie car i'ayme mieux discourir avec toy qu'avec ce meschant monstre.

G. Que veux-tu ?

P. Les autres Euesques sont ils aussi tels que cestuy-cy ?

G. La meilleure partie se gouuerne de ceste façon, mais cestuy-cy en est le portenseigne.

P. Je croy certainement que tu as incité cét homme à faire tant de meschancetez.

G. Tant s'en faut que ce soit moy qu'au contraire il me preuenoit & alloit au deuant : de telle façon que quand i'eusse eu des ailles, à grand peine l'eusse-je peu attraindre.

P. Vrayement ie ne m'esbahis pas s'il y en a si peu qui arriuent pardeça, puisque telles sont gouuerneurs de l'Eglise : combien que i'aye opinion que le peuple peut estre retenu au droict chemin pour ceste occasion seulement, qu'il faict honneur a vne si orde & sale cloaque pour le respect qu'il porte au tiltre de Pape.

G. Tu dis la verité, mais il y a long temps que mon Empereur me faict signe, & remue son baston par ainsi. à Dieu.



